

Pitrori Yosë piyapinënpita ninshitërinso'

Nisha nisha parti ya'huëpisopita ninshitërinso'

1 ¹Ca Pitroco ninshitaranquëma', ni'co'. ¿Noya canpitanta' ya'hua-rama'? Noya canta' isëquë ya'huërahuë. Quisocristo a'parinco nanamën a'china'huaso marë'. Canpitaso' aparisitënëinquëma', ayanquërinëinquëma' ni'ton, nisha nisha parti ya'huëarama'. Pontoquë, Carasiaquë, Capatosiaquë, Asiaquë, Pitiniaquë, inaquëpita ya'huëramaso' nanan a'pataranquëma'. Tëhuëenchachin co isoro'paquë ya'huëmiatarihuahuë'. Yosë nohuanton, Quisocristo imarëhua' ni'ton, Yosë'pa' ya'huëmiatarihua'. Isëquëso' topinan yacapatatëhua pochin ninëhua'. ²Iráca quëra huarë' Tata Yosë nohuitërinquëma'. Nosoroatëinquëma', huayoninquëma' huëntonëinquë ya'conacamaso marë'. Ispirito Santo anoyacancantërinquëma' natëcamaso marë'. Quisocristo corosëquë chiminin oshanëma' inquitiniquëmaso marë'. Yosë nontërama' ni'ton, oshanëma' inquitërinquëma'. Yosë inaora nohuanton, noya catahuainquëma'. Asanocancainquëma'.

Yosë'pa' ya'huëcaso' ninarëhuaso'

³Ma noyacha Tata Yosëso paya. Quisocristo pa'pin inaso'. Na'con nosoroatonpoa', nasitantarëso pochin nasha cancan quëtërinpoa' ina nohuitacaso

marë'. Quisocristo hua'anëntërinpoa'. “Chiminaponahuë', nanopiantarin ni'ton, canpoanta' nanopiantarihua',” ta'tëhua', noya ninarëhua'. Natëtomiaterëhua'. ⁴Yosë'pa' nani tapatërinpoa' noya noya ya'huëcontacaso marë'. Inatohua' co manta' ta'huantarihuahuë'. Co manta' nitapiarinhuë'. Inaquëso' co yanco pochin ahuirinhuë'. Noya noya nisarín. Canpoa marë' Yosëri acorín. Inari chachin ni'sarín. ⁵Tata Yosë ya'ipiya nanitaparin. “Yosë co quënanpirëhuahuë', catahuarinpoa',” topatëhua', noya a'paiarinpoa'. Ma'sha onpohuatëhua', catahuarinpoa' ahuan-tacaso'. Ayaro' tahuëri nóya nicha'ësarinpoa'. Nani yonquirin o'mantacaso'. A'na tahuëri ni'sarëhua'. O'mantaquë huarë' a'paiarinpoa'.

⁶Ina yonquiatoma', capa cancantarama'. A'na tahuëri Yosë nohuanton, pi'pian ma'sha onporama'. Ipora chachin ma'sha onpotopirinëinquë-mahuë', co hua'qui' parisitaramahuë'. Parisitapomarahué', o'mantacaso' tahuëri yonquiatoma', noya cancantoco'. ⁷Ma'sha onpohuatëhua', Yosë catahuarinpoa' ya'ipi cancanënpoa quëran imacaso marë'. Oro tapacaso marë' a'irotopiso pochin nitarinpoa'. Oro inapotohuachinara, noyápiachin pipirin. Ya'ipi në'huë huiquitahuaton, orosachin ninin. Inapochachin iporaso' Yosë nohuanton, pënuë ahuiquitëreso pochin ma'sha onpotërinpoa' noya

noya acoinoaso marë'. Oro pa'ton niponahuë', co ya'huëmiatërinhuë'. Canpoaso nipirinhüë', Yosë natëhua-tëhua', nanpimiatarihua'. Napoaton na'con yonquia'ahua' cancanënpoa quëran huarë' natëcaso'. Ina Yosë nohuantërinso'. Natëmiatohuatëhua', Yosë noya noya ni'sarinpoa'. Quisocristo o'mantahuachin, noya noya acorarinhüë'. Ina pochin ya'noarihua'.

⁸Quisocristo co onporonta' quënanapomarahüë', nosororama'. Ipora huanta' co nicapomarahüë', "Co nonpintarincohuë'. Catahuarinco," ta'toma', ina natërama'. Cancanëma quëran ina nohuitatoma', nóya cancantërama'. Ina yonquiatoma', capa cancantërama'. ⁹Imarama' ni'ton, anoyacancantërinquëma'. Nicha'ësarinquëma' huachi.

¹⁰Iráca pënëntona'piro'sa' ninopi. "A'na tahuëri Yosë inaora nohuanton, nosoroatëinquëma', nicha'ësarinquëma' canpitanta'," topi. Ninotona' ninshita-ponaraihuë', co nitotopihuë' ma'sona tapon napopiso'. Napoaton cancantona', Yosë quiricanën nontopi no'tëquën nitotacaiso marë'. Noya nitotatona no'tëquën sha'huitërinënpoa'. ¹¹Ispirito Santo nohuanton, iráca Cristo ninopi. "Parisitapon. Ina quëran nanpiantarahuatón, noya noya ya'huapon," topi ninotona'. Napoatona', yonquiapi. "¿Ma quëmapita' o'maton, parisitapon? ¿Onporota' parisitaponso'?" topi. ¹²Ina quëran Yosëri anitotërin. "Pahuanarin nancaso'. A'na tahuëri ya'huëpisopita nitotacaiso marë' ca nohuanton, ninorama'," itërin Yosëri. Canpita iyaro'sa' nitotacamaso marë' ninopi. Iporaso' ina noya nanan chachin a'chintërainquëma'. Inápa quëran o'maton, Ispirito Santo catahuarincoi noya a'china'huaiso marë'. Anquëniro'sa quëran huarë' yanitotopirinahuë', co ya'lipiya nitotopihuë'.

Noyasáchin nicacaso' ya'huërinso'

¹³Napoaton chiníquën cancantatoma', yonquico' noya nicacamaso'. Sano yonquico'. Quisocristo o'mantahuachin, inaora nohuanton, nicha'ësarinpoa'. Ina ninatoma', noya cancantoco'. ¹⁴Hua'huaro'sa' noya nipachinara, pa'pina' natëpi. Inapochachin canpitanta' Yosëichin natëco'. Iráca co Yosë nanamën nitotatomarahüë', co yonquiramahuë'. Yano'pihuatomara, no'pirama'. Co noyahuë' yonquihuatamara, co noyahuë' ninama'. Iporaso nipirinhüë' ama inapocosohüë'. ¹⁵Tata Yosë noyasáchin ninin. Huëntonëinquë aya'coninquëma' ni'ton, canpitanta' ina pochin cancantoco'. ¹⁶Quiricanën quëran Yosë pënëninpoa'. "Caso' noyasáchin ninahuë. Napoaton canpitanta' noyasáchin nico'," itërinpoa'.

¹⁷Yosë nontohuatamara, "Tata," itërama'. A'na tahuëri inaso' coisë pochin ni'ton, ya'lipi piyapi'sa' no'tëquën sha'huitarin. Co noyahuë' nipi-sopita no'tëquën ana'intarin. Ya'lipi oshahuaninsopita ana'intarin ni'ton, të'huatacaso' ya'huërin. Chiminaquë huarë' ina yonquiatoma', noya nico'. ¹⁸Iráca shimashonënpoapita topinan quëran ya'huëpi. Moshatopirinahuë', co Yosë nohuitopihuë'. Inapita nonanatomata', canpitanta' topinan quëran ya'huëpiramahuë', Yosë ocoirinquëma' ina nohuitacamaso marë'. Ocoirinquëmaso marë' co coriqui pahuëretërinhuë'. Hui'nin chachin a'paimarin. Coriqui, oro, inapita a'na tahuëri ta'huan-tarin. ¹⁹Hui'ninso nipirinhüë' noya noya. Ina chiminpachina, huënainën pa'nin. Iráca cotioro'sa' co noyahuë' nipachinara, carniroa'hua noyápiachin nininso' masahuatona', tëpapi.

Inapochachin Quisocristoso' nóya. Co manta' oshahuanaponahué', coroséqué chiminin. Oshanénpoa' inquitatonpoa', ocoirinpoa huachi. ²⁰Íráca co'huara isoro'pa' ya'huéyátérasohué', Yosé yonquirin hui'nin a'paimacaso maré'. Ipora huaré' ya'norin canpitanta' nicha'ëinquémaso maré'. Nani ayaro' tahuéri ya'caritapon chachin ya'norin. ²¹Quisocristo anoyacancantërinquëma' ni'ton, Yosé nohuitatoma', natërama': "Tëhuënychachin catahuarinpoa'," tënama'. Quisocristo chiminaponahué', Yosëri ananpitaantarín. Inápaquë quëpantarahuatón, chiníquën nanan quëtërin. Napoaton Yoséichin imarama'. "Canpoanta' ananpitaantarínpoa'," ta'toma', ninarama'.

²²Yosé nanamënso' no'tën nanan. Ina natëhuatama', ya'ipi co noyahué' yonquiramasopita naniantarama'. Noyápiachin cancantarama'. Yosé anoyacancantërinquëma' ninosorocamaso maré'. Napoaton imaramasopita capini noya ninosoroco'. Tëhuënychachin cancanëma quëran huaré' ninosoroco'. ²³Yosëso' co onporonta' chimininhué'. Nanpimiatarín. Inaso' nasha cancan quëtërinquëma' huëntonënuë ya'conacaso maré'. Nasitantarëso pochín noya cancantërama'. Co piyapi quëran nasitatoma' huëntonënuë ya'conamahué'. Nanamën quëran anoyacancantërinquëma'. Nanamënso' co onporonta' ta'huantarínhué'. Ina natëhuatëhua', canpoanta' nanpimiataríhua'.

²⁴"Panpatëro' a'naroáchin ahuirin. Inapochachin canpoanta' chiminarihua'. Yancoro'santa' noyápiachin nipirínhué', a'naroáchin ahuihuachina, nohuatërin. Inapochachin nani ma'sha ni'nëhuasopita ta'huantarín

anta'. ²⁵Sinioro nanamënso nipirínhué', ya'huëmiatarín," tënín Yosé quiricanënuë.

Ina nanan chachin nani a'chintërainquëma'.

2 ¹Ya'ipi co noyahué' yonquiramasopita naniantoco'. Ama iyaro'sa' ninonpintocosoahué'. A'naquën noyasha nonaponaraihué', po'oana quëran co noyahué' nipi. Ama ina pochín nicosohué'. Ya'ipi cancanëma quëran no'tëquën ninontoco'. A'napita noya ya'huëhuachina', ama noyapatocosoahué'. Ama pinotocosoahué'. ²Yosé huëntonënuë ya'conpatëhua', hua'huasha nasha huaipiso pochín ninëhua'. Ni'co'. Canopia'huaya sho'sho apira apira nayarin. Sho'shotatón, noya chinirarin. Inapochachin canpitanta' Yosé noninso chachin na'con na'con nohuantoco'. Ina yonquihuatama', oshaquëran noya noya nisarama'. Chiníquën cancantatoma', noya cha'ësarama'. Yosé nanamënáchin achinicancaninpoa'. ³"Sinioroso' noya," ta'toma', nani imarama'. Cosharo' pi'nirëso pochín pi'pian nohuitërama'. Na'con na'con ina nohuitoco'.

Quisocristo na'pi pochín nininso'

⁴Na'pi quëran yapëihuatëra, a'na na'piso' na'con na'con nohuantëré' pëi' achinicaso maré'. Quisocristo ina na'pi pochín ninin. Piyapi'sari co nohuantopirínahué', Yosëriso' nóya nicatón, na'con nohuantërin. Apira apira Quisocristo yonquico'. Inaso' nanpimiatarín. ⁵Imarama' ni'ton, canpitanta' noya na'piro'sa pochín nisarama'. Nanpimiataríama'. Ya'ipi imarëhuasopita Yosé acorínpoa' pëinën pochín nicacaso maré'. Cancanënpoa quëran huaré' ina na'con chinotërehua' ni'ton, corto hua'ano'sa pochín

nisarëhua!. Nani tahuëri ina chinotatëhua!, “Yosparinquën Sinioro,” itahua!. Nicatahuacasona! ama naniantahua-sohuë!. Quisocriso catahuarinpoa! ina pochin nicacaso!. Ina marë! Yosë noya ni'sarinpoo!. ⁶Quiricanën quëran ina ninorin:

“Yapëihuachinara, noya noya na'pi nohuantopi pëi! achinicaso marë!. Cristo ina na'pi pochin nisarin. Sionquë acoarahuë. Ina natëhuatama!, ‘Co naniantarinpoo-huë!’ ta'toma!, co sëtëreso pochin cancantaramahuë!” tënin Yosë quiricanënuë.

⁷Quisocriso natëhuatëhua!, ina na'con nohuantarihua!. A'naquënso nipirinhüë! co natëtonaraihuë!, co Quisocriso nohuantopihuë!. Quiricanën quëran naporin:

“Na'pi quënanpachinara, sacatoro'sa! co nohuantopihuë!. Të'yatopi. Ina na'piso nipirinhüë! noya noya ninin pëicaso marë!” tënin.

Inapochachin Quisocriso noya nipirinhüë! co nohuantopihuë!. ⁸Quiricanën quëran itantarin:

“Iratohuatëra, na'pi i'patahuatë!, anotëre!” tënin. Inapochachin a'naquën co Quisocriso nanamën natëtonaraihuë!, nisha cancantopi. Ina marë! Yosë nohuanton, na'linpi huachi.

⁹Imarëhuasopitaso nipirinhüë! nohuantërinpoa!. Huayoninpoa! ina nohuitacaso marë!. Inasáchin hua'a-nëntërinpoa!. Nani acorinpoo! corto hua'ano'sa pochin nicatëhua!, ina marë! sacatacaso!. Noyápiachin cancan quëtërinpoa!. Yosë piyapinënpoa! ninëhua!. Iráca tashi pochin cancantopirëhuahuë!, Yosë nicha'ërinpoa! tahuëri pochin

cancantacaso marë!. Acorinpoo! Yosë noya nosororinpoo! sha'huicaso marë!. ¹⁰Iráca co Yosë piyapinënpoa! nipirinhüë!, iporaso! nani huëntonënuë aya'coninquëma!. Iráca co insonta! tëhuënuhachin nosororinquëmahüë!. Iporaso! Yosë nosororinquëma!.

Yosë noya imahua!

¹¹Nosororanquëma! iyaro'sa! ni'ton, pënënanarquëma!. Quisocriso imatoma!, co isoro'paquë ya'huëmiataramahuë!. Yosë'pa! ya'huëmiataramaso!. Napoaton ama ma'sha isoro'paquë ya'huërinso-pitaráchin yonquicosohuë!. Isoro'paquë no'piápi, monshihuanapi, taparosáchin nonatona!, capa cancantapi. Ama ina pochin cancantocosohuë!. Ina pochin cancantohuatama!, sopai minsëarinquëma!, co Yosë pochin cancantaramahuë!. ¹²Co imapisopitahuë! pinorinënuëma!. “Co noyahuë! nipi,” topi. Ina nipirinhüë!, noyasáchin nico! ni'inënuëma!. Ina quëran a'na tahuëri Yosëri catahuarin ni'ton, no'tëquën yonquihuachina!, yonquiarinënuëma!. “Ma noyacha Yosëri catahuarin ni'ton, noya nipi paga,” tosapí.

Hua'ano'sa! natëcaso! ya'huërinso!

¹³Sinioro imarama! ni'ton, hua'ano'sa! natëco!. Ya'ipi acorinsopitanta! natëco!. Copirnosoo! chini chiníquën nanantërin ni'ton, natëcaso! ya'huërin. ¹⁴Ninano hua'ano'sa!, chirinchiros! sonto'ro'sa!, ponisario'sa!, inapita acorin piyapi'sa! a'paicaiso marë!. Co noyahuë! nipa-china!, ana'intapi. Noya nipachina!, noya ni'sapi. Inapitanta! natëco!. ¹⁵Ina Yosë nohuantërin. A'naquën co Yosë nanamën nitotatonaraihuë!, co yonquipihuë!. Quisocriso imarama! ni'ton, a'naroáchin yapinorinënuëma!.

Noyasáchin nico' ama pinoinénquemaso maréhué'.

¹⁶“Yosé nicha'érinpoa,” ta'toma', noya yonquico'. Iráca nanan co natécaso' ya'huépirinhué', ama ina yonquiatoma' téhuécosohué'. Yosé hua'anéntérinquéma' ni'ton, ina nohuantérinsoáchin natéco'. ¹⁷Ya'ipi piyapi'sa' noya nontoco'. Imaramasopita capini noya ninosoroco'. Yosé té'huatatoma', no'téquén natéco'. Copirnonta' noya nicatoma', natéco'.

Quisocristo nonanacaso' ya'huérinso'

¹⁸A'naquéma' patron maré' sacatërama'. Asacatohuachinquéma', natéco'. Yosé ni'sarinquéma' ni'ton, noya natéco'. A'naquén patron noya. Nosororinquéma'. A'naquénso nipirinhué' yáno'huitérin. Co noyahué' nipirinhué', inapitanta' natécaso' ya'huérin. ¹⁹Topinan quéran ana'intoahuachinquéma', ama no'huicosohué'. Yosé yonquiatoma', ahuantoco'. Ina maré' Yosé noya ni'sarinquéma'. ²⁰Co noyahué' nipatama', ana'intarinquéma'. Ahuantohuatama', co ina maré' noya ni'ninquémahué': “No'téquén ana'intoahuachinquéma', ahuantacaso' ya'huérin,” topi ya'ipiya. A'na tahuériso nipirinhué' noya nipiramahué', aparisitarinénquéma'. Co no'huitatomahué', ahuantohuatama', Yosé noya ni'sarinquéma'. ²¹Ina pochin ahuantacaso' Yosé nohuantérin. Quisocristo canpoa maré' parisitérin. Parisitaton, a'chintérinpoa' canpoanta' ina pochin ahuantacaso'. Ina iyaro'sa' nonanco'. ²²Inaso' nóya ninin. Co manta' onporinhué'. Co pi'pian tëranta' nonpininhué'. ²³Inimiconénpitari pinopachinara, co yai'huèrètèrinhué'. Aparisitopirinahué', co no'huirinhué'. “A'na tahuéri Yoséri no'téquén ana'intarin,” ta'ton, Yoséchin natérin. ²⁴Quisocristo isoro'paqué

o'maton, piyapi chachin nasitimarin. Oshanénpoa maré' coroséqué chiminin. Inaora ya'huèrètèrinpoa'. Ya'ipi co noyahué' yonquiréhuasopita naniantatèhua' noya nicacaso maré' chiminin. Coroséqué parisitaton, anoyacancantérinpoa'. ²⁵Ohuica chihuérinso pochin nicatèhua', co Yosé nohuitopirèhuahué', iporaso' Quisocristo imarèhua'. Inaso' ohuicaros'a' hua'anén pochin ni'ton, noya a'paiarinpoa'.

So'yahuano'sa' pënéninso'

3 ¹⁻²Sanapi'santa' so'yahuachina', sol'ina' natéina'. A'naquén quémapi'sa' co Yosé nanamén natéyátèrapihué'. Inahuanta' imacaiso maré' sol'ina' noya natéina'. Noya nocoma'ina'. Ama a'na quémapi téhuainasohué'. Yosé yonquiatona', noya niina'. Noyasáchin nipachin, ina nicaton, sol'ionta' oshaquéran imapon nimara. Co sa'ini pënénpirinhué', noya nininso maré': “Noya nanan imasarin,” tapon inanta'. ³Ama imoyaro'sa' nitapacasaráchin yonquicosohué'. A'naquén sanapi'sa' ainéna tapacasoachin yonquipi. Oro quéran nipiso' a'sontanpapi. Notohuaro' miyo pè'pèpi. Pa'ton nininsopita a'mocaiso pa'yatopi. Noyápiachin nitapacasaráchin yonquipi. ⁴Quisocristo imapatama', ama aipi ya'norinsoráchin yonquicosohué'. Noyápiachin cancantacamaso' na'con na'con yonquico'. Yosé pochin yonquicaso' ya'huérin. Nitaparamaso' co ya'huémiatarinhué'. Cancanénpoa quéran yonquiréhuasopitaso nipirinhué', ya'huémiatarin. Napoaton imoyaro'sa' sano cancantoco'. Ama pi'pian tëranta' no'huitocosohué'. Nóya cancantohuatama', Yosé noya ni'sarinquéma'. ⁵Iráca noya sanapi'sa' Yosé natérinso'pita ina pochin nipi. “Yosé catahuarinco,” ta'tona', inaíchín yonquipi. So'ina' noya

natëtona', noyápiachin cancantopi.
 6Apraan sa'in ina pochin ninin, Sara itopiso'. So'in noya natërin. "Camaihuachincora, natërahuë mini," tënin. Canpitanta' imoyaro'sa' noya nipatama', ina pochin cancantarama'. Noyápiachin cancantohuatama', co të'huatochinachin cancantaramahuë'.

7Canpitanta' iyaro'sa', sa'ama' nosoroatoma' noya ichiya'huëco'. Co canpita pochin chinipihuë' ni'ton, noya nicatoma', sanoanan quëran nontoco'. Inapitanta' Quisocristo imapi ni'ton, canpitarë'quëma chachin Yosë huëntonënguë ya'conpi anta'. Inapitanta' nanpimiatapi. Ina yonquiatoma', sa'ama' noya nosoroco'. Inapotohuatama', Yosë nontohuatama', catahuarinquëma'.

Aparisitërinënpoaso'

8Ya'ipinquëma' noya nini'toma', ya'huëco'. A'naquën sëtohuachina', noya nontoco' ama aquëtë' sëchinasohuë'. Noya cancantohuachina', canpitanta' noya cancantoco'. Imaramaso capini ninosoroco'. Ninosoroatoma' iyaro'sa' nicatahuaco'. Ama ninocancosohuë'. Canpitanta' imoyaro'sa', noya ninontoco'. 9Piyapi'sa' ma'sha onpotohuachinënguëma', ama i'huërëtacamaso' yonquicosohuë'. Pinopachinënguëma', ama canpitariso' pinocosohuë'. Noya nontoco'. Naporahuaton, Yosë nontoco' inapitanta' catahuain. Imapatëhua', ina sha'huitërinpoa' a'napitanta' nosorocaso'. Napohuatëhua', Yosë noya catahuarinpoa'. 10Íraca quiricanën quëran itërinpoa':

"Noya ya'huëcamaso' nohuan-tohuatama', noyasáchin nonco'. Ama insonta' nonpintocosohuë'. Inapohuatama', noya cancantatoma', noya ya'huarama'.

11Ya'ipi co noyahuë' yonquiramasopita naniantatoma', nóya nico'. Sano piyapi nicatoma', ama insonta' no'huicosohuë'. A'napitanta' catahuaco' noya nini'tona' ya'huë'ina'.

12Noya nipatama', Sinioro a'paairinquëma'. Ina nontohuatama', natanarinquëma'. Nipirinhue', co noyahuë' nipatama', co Sinioro tahuërëtarinquëmahuë'," tënin.

13¡Noyasáchin nipatama', co a'napita yai'huërëtarinquëmahuë'! 14A'na tahuëriso nipirinhue' imaramaso marë' aparisitohuachinënguëma', ama të'huatocosohuë'. "Quisocristo marë' parisitarëhua'," ta'toma', noya cancantoco'. Yosë noya catahuarinquëma' ni'ton, ama pa'yancosohuë'. 15Ya'ipi cancanëma quëran Quisocristo yonquico'. Inaso' hua'anëntërinpoa' ni'ton, chinotoco'. Nani tahuëriya chiníquën cancantatoma', yonquico' Quisocristo nanamën sha'huicamaso marë'. Ina quëran "¿Onpoatomata' imarama'?" itohuachinënguëma', a'naroáchin no'tëquën sha'huitarama'. 16Ama no'huitë pochin chiníquën sha'huitocosohuë'. Sanoanan quëran pënëncó. Yosë yonquihuatama', noya sha'huitarama'. Quisocristo imarama' ni'ton, noyasáchin nicatoma', noyápiachin cancantoco'. Ina quëran pinopirinhue'mahuë', "Co'ta noya nisapi. Quëmariso' nonpinapiran," itarin a'narinta'. Itohuachina, pinotona'piso' tapanarin.

17Co noyahuë' nipatëra, parisitacaso' ya'huërin. A'na tahuëriso nipirinhue' Yosë nohuanton, imarëhuasopitanta' parisitarëhua'. Noya nipirëhuahuënta', piyapi aparisitarinhue'poa'. Ina pochin parisitacaso' Yosë nohuantërin. 18Quisocristonta' nóya niponahuë',

oshahuanëhuaso marë' parisitërin. Oshanënpoa' inquitinpoaso marë' chiminin. A'naromarëáchin chiminin. Noya nipo-nahuë', oshahuano'sa marë' chiminin. Canpoanta' Yosë nohuitacaso marë' chiminin. Piyapi ni'ton tëhuënychachin tëpapi. Chiminaponahuë', nanpiantarin ni'ton, noya noya ya'huantarín. ¹⁹Ina pochin nanpiantaton, pa'nin chimipiro'sa' ya'huërinquë. Inaquë tashinan pëiqué ya'huapiso pochin nininsopita nanan sha'huitonin. ²⁰Inapitaso' iráca Noi nanopiso', pa'pi co noyahuë' cancantopi ni'ton, ina nohuanton, Noi pënëntárin. Pënëntopirinhuë', co yanatëpihuë'. Yosëso' co a'naroáchin ana'intërinhuë'. Noi panca nancha nicaso', ninarapirinhuë', co natëpihuë' ni'ton, ana'intërin. Ipora huanta' parisitapi. Noiso' nancha tinirahuaton, ya'conin. Naporo' posaya'píchin il' quëran cha'ëpi. ²¹Inapochachin iporaso' Yosë nicha'ësarínpoa'. Anoyacancantohuachinpoa', aporintërinënpoa'. Co në'huë inquitinënpoaso marë' aporintërinënpoahuë'. Aporintohuachinënpoara, Yosë nontërehua' catahuainpoaso marë'. "Ya'ipi oshanëhuë inquitoco. Catahuaco noyasáchin nicato, noyápiachin cancanchi," itërehua'. Ina marë' anoyacancantërinpoa'. Quisocriso nanpiantarin ni'ton, nicha'ësarínpoa'. ²²Nanpiantarahuatón, Yosë'pa' pantarin. Yosë inchinan quëran huënsëaton, chini chiníquën nanantarin. Ya'ipi anquëniro'sa', hua'ano'sa', chiníquën nanantërin sopita inapitari natëpi huachi.

Iráca naporëhuaso' naniantahua'

4 ¹Quisocriso isoro'paquë o'maton, tëhuënychachin parisitërin. Napoaton canpitanta' parisitohuatama', ahuantoco'. Quisocriso yonquiatëhua', noya ahuantohuatëhua', noya noya

cancantarihua'. Co huachi oshahuana-caso' pa'yatarihuahuë'. ²Napoaton ama iráca naporamaso pochin yonquicosohuë'. Ipora quëra huarë' Yosë nohuantërinsoáchin natëco'. ³Hua'qui' co noyahuë' ninama'. Monshihuanama', nisha nisha sanapi noyarama', no'pirama'. Pita nicacasoáchin yonquirama'. Mamanshi mosharama', co inapita moshacasohuë' nipirinhuë'. Iráca co Yosë imatomahuë', inaporama'. Inapoatoma', tahuëri chinirama'. ⁴Iporaso nipirinhuë' imarama'. A'napita yano'pihuachinara, amatopirinëinquëmahuë'. Co yano'pihuatomaramahuë', no'huirinëinquëma'. "¿Onpoatomata pita nipatëira, co yani'namacoihuë'?" itatënenquëma', pinorinëinquëma'. ⁵Iporaso' pinopirinëinquëmahuë', ayaro' tahuëri nanihuachin, Yosë sha'huitiinpoaso' ya'huërin. Nanpirëhuasopita, chiminpisopita, ya'lipinpoa' coisë pochin nontarinpoa'. Co noyahuë' nipisopita no'tëquën ana'intarin. ⁶A'naquën nohuitëramasopita nani chiminpi. Piyapi ni'ton, chiminpi. Chiminaponaraihuë', co'huara chimiyantërasoihuë', Quisocriso nanamën a'chintopi. Natëpi ni'ton, hua'yanëna quëran Yosë pochin nanpimiatapi.

Nisha nisha acorinpoaso'

⁷Ayaro' tahuëri nani ya'cariarinpoa'. Napoaton ama nisha nisha yonquicosohuë'. Noya yonquiatoma', Yosë nontáco'. ⁸Ya'ipi cancanëma quëran noya ninosoroco'. Ina na'con na'con Yosë nohuantërin. Piyapi nosorohuatama', co noyahuë' nipirinahuënta', a'naroáchin nanan anoyatarama'. Co noyahuë' nipisopita naniantatoma', co huachi yonquiamahuë'. ⁹Ama apiracosohuë'. Ni'toro'sa' huë'pachina', noya nontoco'. Noya cancantatoma', a'caco', ahue'ëtoco'. ¹⁰Yosë imarëhuasopita acorinpoa' nisha

nisha nicacaso'. Inaora nohuanton, a'naya a'nayanpoa' catahuarinpoa' ma'sona nohuantërinso' nitotacaso'. Napoaton ama topinan quëran ya'huëcosohuë'. Ma'sona nitotohuatama', noya nico' a'napita catahuacaso marë'. Noya noya imacamaso marë' nicatahuaco'.¹¹ A'naquën Yosë nohuanton, nitotopi pënëntacaiso'. Nitotohuatama', Yosë noninso chachin pënëntoco'. A'naquëonta' Yosë nohuanton, cania'piro'sa', sa'ahuario'sa', inapita catahuapi. Yosë catahuarinquëma' ni'ton, ina yonquiatoma', a'napita noya catahuaco'. Ma'sona tëranta' nipatama', ya'ipi cancanëma quëran nico'. Piyapi'sa' nicatënëinquëma' Yosë noya noya yonquicaiso marë' inapoco'. Yosëso' noya noya ninin. Chini chiniquën nanantërin. Ya'ipi piyapi'sari ina chinochina'. Quisocriso catahuarinpoa' ina pochin cancantacaso'. Amen.

Nisha nisha parisitërehuaso'

¹²Na'con iyaro'sa', imoyaro'sa', nosororanguëma'. Iporaso' chiniquën parisitohuatama', ama pa'yancosohuë'. Co topinan quëran ma'sha onporamahuë'. Imarama' ni'ton, ina pochin parisitacaso' ya'huërin. Yosë nohuanton, napoarama' noya noya imacamaso marë'.¹³ Quisocriso parisitërinso pochin parisitohuatama', noya cancantoco'. Ina quëran chiniquën nanantaton o'mantahuachin, noya noya cancantarama'.¹⁴ Imaramaso marë' pinopachinëinquëma', Yosë noya ni'sarinquëma'. Ispirito Santo ya'coancantatënquëma' achinicananarinquëma' ni'ton, noya cancantoco'.

¹⁵A'naquën piyapi'saso' co noyahuë' cancantopi. Tëpatopi, ihuatopi, nanan pa'yatopi inapitaso' ana'intacaso' ya'huërin. Ama inapita pochin yonquicosohuë'. Ina marë' parisitohuatëhua', tapanacaso' ya'huërin.¹⁶ Nipirinhüë', imaramaso marë'

aparisitohuachinëinquëma', ama tapanacosohuë'. "Quisocriso imarai mini. Ma noyacha Tata Yosëso paya," topatama', Yosë noya ni'sarinquëma'.

¹⁷Nani ana'intinpoaso' naniriarin. Ipora chachin imarëhuasopita pi'pian pi'pian ana'intarinpoa'. Co noyahuë' nipatëhua', tatanpoa pochin pi'pian ana'intarinpoa' noya noya yonquicaso marë'. ¡Yaro' tahuëriso nipirinhüë' co nanamën natëpisopitahuë' chiniquën ana'intarin! Parisitopiquë a'pararin ni'ton, parisitomiatapi.¹⁸ Yosë quiri-canënuquë sha'huitërinpoa': "Noya piyapi'santa' parisi quëran cha'ësapi. ¡Oshahuano'saso nipirinhüë' co onporonta' cha'ësapihuë'! Ya'ipi co noyahuë' nipisopita chiniquën parisitomiatapi," tënin.¹⁹ Napoaton Yosë nohuanton parisitohuatama', noya nico'. "Catahuaco Siniro chiniquën cancanchi," itoco'. Yosë chachin nininpoa'. Inaso' co onporonta' naniantarinpoahuë'.

Ansiano'sa' pënëninso'

5¹ Ya'ipi ansiano'sanquëmanta' pënënanquëma'. Canta' ansianoco ni'to, achinicancainquëma', tënhuë. Quisocriso isoro'paquë nipon, nohuitërahuë. Corosëquë parisitohuachina, cari ni'nahuë ni'ton, sha'huirárahüë. O'mantahuachin, canpoanta' inarë'quënpoa' hua'anëntarihua'. Napoaton iporaso' pënënanranquëma' noya nicacamaso marë'.² Quisoso imapisopita iyaro'sa' noya ni'co'. Yosë acorinquëma' ya'huëramaquë a'chinacamaso marë'. Hua'anëni ohuicanënpita noya a'pairinso pochin noya a'paico' imamiachina'. A'naya tëranta' co noyahuë' nipachin, sanoanan quëran pënëncoco' noya yonquianta'in. Nani tahuëri catahuaco' noya imaina'. Ama chirotomahuë', a'chinco'. Ina pochin nicacaso' Yosë nohuantërin.

Ni'ton, canpitanta' noya nohuanta-toma', a'chincó'. Ama canacaso marë' a'chincosohuë'. Nóya cancantatoma', Yosë marë' sacatoco'. ³Pënëntohua-tama', ama chiníquën nontocosohuë'. Ama hua'an pochin cancantatoma', camaitocosohuë'. Yosë acorinquëma' a'chintëramasopita catahuacamaso'. Napoaton noya yonquiatoma', noya nico' inapitanta' inachachin nonainquëmaso marë'. ⁴Quisocristo imarëhua' ni'ton, ya'ipinpoa' hua'anëntërinpoa'. A'na tahuëri o'mantararin. Noya ansiano'sa' nipatama', naporo' noya canaarama'. Isoro'paquë canatohuachinara, yancotë' huëron quëran nipiso' quëtopirinahuë', inaso' a'naroáchin ahuirin. Inapaquëso nipirinhüë' canahuatama', ya'huëtomiatarinquëma'. Noya noya ya'huëcontarama'.

Yosë catahuarinpoaso'

⁵Hui'napi'sanquëmanta' ansiano'sa' natëco'. Ya'ipinquëma' noya yonquiatoma', nicatahuaco'. Quiricanën quëran itërinpoa':

“Caora noya nisarahuë, ta'toma', nocantohuatama', Yosë co noya ni'sarinquëmahüë'.

Nipirinhüë', ‘Caora co nanitërahuë' noya nica'huaso'. Catahuaco,' topatama', inaora nohuanton, Yosë nóya catahuarinquëma',” tënin.

⁶Parisitapomarahüë', ama Yosë no'hui-cosohuë'. Chiníquën nanantaton, ni'sárinquëma' ni'ton, natëco'. Ina noya yonquihuatama', tahuëri nanihua-chin, noya noya acoarinquëma'. ⁷Ama ma'sha onpochináchin yonquicosohuë'. Ya'ipiya Yosë sha'huitoco' catahuainquëma'. Ina quëran: “Nosoroatonpoa', co naniantarinpoahuë',” ta'toma' sano cancantoco'.

Sopai yaminsërinpoaso'

⁸Sopaiso' inimiconënpoa'. Yacamai-rinpoa' co noyahuë' nicacaso marë'. Pa'pini' yamaninpoaso pochachin sopai pa'sarin piyapi'sa' minsëcaso marë'. Napoaton noya yonquiatoma', ni'sáco'. ⁹Ama pi'pian tëranta' ina tahuëreto-cosohuë'. Chiníquën cancantatoma', sha'huitoco' pa'in. Yosëíchin natëco'. Co canpitaíchin parisitaramahuë'. Ya'ipi parti Yosë imarëhuasopita parisitarëhua'. Ina yonquiatoma', chiníquën cancantoco'. ¹⁰Yosë pa'pi nosororinpoa'. Quisocristo imarëhua' ni'ton, a'na tahuëri inápaquë quëpantarinpoa'. Iporaso' ma'sha onpopirëhuahuë', catahuarinpoa'. Co hua'qui' parisitarihuahuë'. Ina quëran nosoroa-tonpoa', anoyatarinpoa'. Achinicancanar-inpoa'. Noya noya acoarinpoa'. ¹¹Yosë chini chiníquën nanantërin. Ya'ipiya hua'anëntarin ni'ton, co onporonta' pipiarinhüë'. Inasáchin chinochina'. Amen.

Tiquiapon pochin ninshitërinso'

¹²Iya Siripano catahuarinco ninshita'huanquëmaso'. Inaso' noya ni'nahuë. Noya imarin. Nani pi'pian ninshitëranquëma' pënëna'huanquëmaso marë'. Yosë yonquirinpoaso chachin nani sha'huitëranquëma'. Noya nosororinpoa', tënahüë. Ina yonquiatoma', ama a'pocosohuë'.

¹³Papironiaquënta' Yosëri huayo-ninsopita ya'huëpi. Inapita saludos a'patarinëinquëma'. Marconta' saludos a'patarinquëma'. Inaso' hui'nahuë pochin ni'nahuë. ¹⁴Ya'ipinquëma' noya ninosoroatoma', nisë'quëco'. Quisocristo imarama' ni'ton, Yosë catahuainquëma' sano cancantacamaso marë'. Nani huachi.

Pitro